

**ДОТООДЫН ЦЭРГИЙН ТУХАЙ ХУУЛЬД НЭМЭЛТ, ӨӨРЧЛӨЛТ ОРУУЛАХ
ТУХАЙ ХУУЛИЙН ТӨСӨЛ БОЛОН ХАМТ ӨРГӨН МЭДҮҮЛСЭН ХУУЛИЙН
ТӨСЛҮҮДИЙН ХЭЛЭЛЦЭХ ЭСЭХ ТАЛААРХ ХУУЛЬ ЗҮЙН БАЙНГЫН
ХОРООНЫ САНАЛ, ДҮГНЭЛТ**

2022 оны 12 дугаар
сарын 20-ны өдөр

Улаанбаатар
хот

Илтгэгч нь: Улсын Их Хурлын гишүүн Б.Дэлгэрсайхан

Улсын Их Хурлын дарга, эрхэм гишүүд ээ,

Монгол Улсын Засгийн газраас 2022 оны 11 дүгээр сарын сарын 30-ны өдөр Улсын Их Хуралд өргөн мэдүүлсэн Дотоодын цэргийн тухай хуульд нэмэлт, өөрчлөлт оруулах тухай хуулийн төсөл болон хамт өргөн мэдүүлсэн хуулийн төслүүдийг хэлэлцэх эсэх асуудлыг Хууль зүйн байнгын хороо 2022 оны 12 дугаар сарын 20-ны өдрийн хуралдаанаараа хэлэлцлээ.

Хууль санаачлагч улсын онц чухал болон бусад объектын хамгаалалтын найдвартай, аюулгүй байдлыг хангах чиг үүргийн хүрээнд цэргийн болон хууль сахиулах байгууллагуудын хамтын ажиллагааг уялдуулах, дотоодын цэргийн алба хаагч нийтийн тээврийн хэрэгслээр үнэ төлбөргүй зорчих, хууль сахиулах байгууллагын алба хаагчдын ажиллах нөхцөл баталгаагаар хангах зорилгоор холбогдох өөрчлөлтийг тусган хуулийн төслийг боловсруулсан байна.

Хуулийн төсөл батлагдсанаар иргэн, хуулийн этгээд, төрийн байгууллагад шинээр чиг үүрэг бий болгохгүй, нэмэлт зардал бий болгох зохицуулалт байхгүй тул хуулийн төслийг хэрэгжүүлэхтэй холбогдон гарах зардлын тооцооплыг хийх шаардлагагүй гэж гэж хууль санаачлагч үзсэн байна.

Хуулийн төслийг D-parliament.mn цахим хуудаст байршуулан олон нийтийн саналыг авч байгаа болно.

Байнгын хорооны хуралдаанаар хуулийн төслийг хэлэлцэх үед Улсын Их Хурлын гишүүн Ш.Адьшаа хуулиар халдашгүй байдлыг тогтоох зөв эсэх талаар, Улсын Их Хурлын гишүүн Б.Энхбаяр дотоодын цэрэг нь төрөлжсөн болон дэмжлэг үзүүлэх, энхийг дэмжих, террорист үйлдлийн сөрөг тусгай ажиллагаанд оролцох мэргэжлийн нэгжтэй байхаар хуулийн төсөлд тусгасан байх бөгөөд тусгай салааг хугацаат цэргээс бүрдүүлэх эсэх, Дотоодын цэргийн штабын дарга нь цагдаа, дотоодын цэргийн байгууллагад 18-аас доошгүй жил ажилласан байх шалгуурын талаар, мөн штабын дарга нь Дотоодын цэргийн командлагчийг түр өзгүйд түүнийг орлох зохицуулалтын талаар, хот, суурины дотор такси үйлчилгээнээс бусад нийтийн тээврийн хэрэгслээр үнэ төлбөргүй зорчих шаардлагын талаар, мөн дотоодын цэргийн алба хаагчид халдашгүй эрх олгохоор заасан зохицуулалтын талаар, Улсын Их Хурлын гишүүн Ц.Сандаг-Очир хуулийн төслийг зарчмын хувьд дэмжиж байгаагаа илэрхийлээд хууль хэрэгжүүлэхтэй холбоотой үүсэх зардал 2023 оны улсын төсөвт туссан эсэх, цагдаа, дотоодын цэргийн албан хаагчдын дундаж цалингийн ялгаа, ажилласан хугацааны нэмэгдэл, урамшууллын талаар мөн газар зүйн байршилаас шалтгаалан алслагдсан дүүргүүдэд ажиллаж байгаа албан хаагчдын нийгмийн баталгааг шийдвэрлэх асуудал орхигддог, таван жил тутам 30 сарын цалинтай тэнцэх хэмжээний асуудал орхигддог, таван жил тутам 30 сарын цалинтай тэнцэх хэмжээний

урамшуулалд хамрагдах боломж байгаа эсэх талаар асуулт асууж, хариулт авсан болно.

Улсын Их Хурлын гишүүн Б.Дэлгэрсайхан хуулийн төслийг зарчмын хувьд дэмжиж байгаагаа илэрхийлээд цалин хангамж, нийтийн тээврийн хэрэгслээр үнэ төлбөргүй зорчихоос гадна орон тоо нэмэх, бие даасан байдлыг нь хангах асуудлыг нэг мөр шийдвэрлэх шаардлагатай талаар, Улсын Их Хурлын гишүүн Ц.Сандаг-Очир нийгмийн аюулгүй байдал, дэг журмыг сахиулах албан хаагчдын нийгмийн асуудал, цалин урамшууллыг нэмэгдүүлэх, тогтвортой ажиллах баталгаа, техник хэрэгслийг сайжруулах асуудлыг цогц байдлаар шийдвэрлэх талаар, Улсын Их Хурлын гишүүн Д.Цогтбаатар хуулийн төслийг зарчмын хувьд дэмжиж байгаа бөгөөд цаашид хуульд нэмэлт, өөрчлөлт оруулахад иргэдийн эрх, эрх чөлөөг эдгээр байгууллагууд хамгаалахад анхаарах мөн хууль сахиулах байгууллагын алба хаагчдыг хүний эрх, эрх чөлөөг хамгаалах эрх зүйн сургалтад тогтмол хамруулдаг байх талаар, Улсын Их Хурлын гишүүн Ш.Раднаасэд цэрэг, цагдаагийн байгууллагад ажиллаж байгаа албан хаагчид ажиллах нөхцөл, нийгмийн баталгаанаас шалтгаалан ажлаас гарах болсон бөгөөд энэ хуулийн төсөлтэй холбогдуулаад цалин, хангамж, ажиллах нөхцөлийг сайжруулах талаар, Улсын Их Хурлын гишүүн Л.Мөнхбаатар гишүүдээс гарсан дотоодын цэргийн цалин хангамж, хууль зүйн болон нийгмийн баталгааны талаар хэлэлцүүлгийн шатанд судлан үзэж, шийдвэрлэх боломжтой талаар тус тус санал хэлсэн болно.


Дотоодын цэргийн тухай хуульд нэмэлт, өөрчлөлт оруулах тухай хуулийн төсөл болон хамт өргөн мэдүүлсэн хуулийн төслүүдийг Байнгын хорооны хуралдаанд оролцсон гишүүдийн олонх буюу 70 хувь нь үзэл баримтлалын хүрээнд хэлэлцэхийг дэмжиж, чуулганы нэгдсэн хуралдаанаар хэлэлцүүлэх нь зүйтэй гэж үзсэн болно.

Улсын Их Хурлын эрхэм гишүүд ээ,

Дотоодын цэргийн тухай хуульд нэмэлт, өөрчлөлт оруулах тухай хуулийн төсөл болон хамт өргөн мэдүүлсэн Зөрчлийн тухай хуульд нэмэлт оруулах тухай, Зөрчил шалган шийдвэрлэх тухай хуульд нэмэлт, өөрчлөлт оруулах тухай хуулийн төслүүдийг хэлэлцэх эсэх талаарх Хууль зүйн байнгын хорооны санал, дүгнэлтийг хэлэлцэн шийдвэрлэж өгөхийг Та бүхнээс хүсье.

Анхаарал тавьсанд баярлалаа.

ХУУЛЬ ЗҮЙН БАЙНГЫН
ХОРООНЫ ДАРГА



Л.МӨНХБААТАР